

Protocol

dalla seduta dil cussegl da vischnaunca,
gievgia, ils 14 d'ust 2025: allas 20⁰⁰ – 21⁴⁵
Liug: Stanza da sedutas Cumiera, Center Fontauna

Presidi: Adrian Flepp

Actuar: Roland Cajcob

Presents:

- | | | |
|-----------------------------|---|--|
| a) Cussegl | Silvia Bucheli-Caduff
Theres Burri Gadola
Silvio Candinas
Felicia Deflorin
Adrian Flepp
Otmar Flepp
Remo Huonder | Christian Loretz
Giusep Lozza
Lucas Lutz
Rafael Maissen
Alfred Spescha
Ignaz Venzin |
| perstgisas | Placi Flury | Admir Jasarevic |
| b) Suprastonza
communala | René Epp
Clemens Berther
Wendelin Jacomet | Jris Lombris
Paul Flurin Schmidt |
| c) Cader | Urban Maissen, menader infrastruttura e baghegiar
Sandro Muscas, responsabel per infrastruttura
Pierino Bisquolm, survigilader dallas sereneras | |

Plaid d'avertura dil president:

Cordial beinvegni anavos dallas vacanzas da stad. Sperel fetg che vus tuts haveis saviu guder il temps e tancar energia per la secunda mesadad digl onn.

Dapi nossa davosa seduta han differents eveniments fatg novitads. Quei sin palancau internaziunal, naziunal ed era communal.

Ils dazis da 39 pertschien sin products che vegnan exportai ell'USA ein realitad. Quei pertucca cunzun l'industria da maschinass, d'uras, d'apparats da precisiun ni era las tuortinas da nuschs oriundas da Sedrun. Talas fatschentass ston uss alla cuorta elaborar novs concepts ed anflar sligiazions per segirar lur existenza.

La Svizra ei sepresentada cun il campinadi europeic da ballapei dallas dunnas da sia megliera vart. Pli u meins tut ils giugs eran bein occupai e havevan ina fetg buna atmosfera. Cun lur giugs ha l'equipa dalla Svizra procurau per bia bialas emozions ed interessants partidas.

La catastrofa da natira a Blatten ha inagada dapli mussau la forza dalla natira ed aviert danovamein la discussiun davart la midada dil clima. Igl ei tragic da piarder enteifer in cuort mument il dacasa, l'existenza ed il vitg cun lur cultura e veta.

La carta d'aur ha era caschunau sur la vischnaunca ora per discussiuns. Ils habitonts dallas vischnauncas vischinontas havessen era grond interess d'ina talla purschida. Forsa procura gest la carta d'aur da s'entupar e prender en mira discussiuns davart ulteriuras collaboraziuns ni schizun fusiuns.

Il Center Fontauna cun lur purschidas en casa ed el contuorn prosperescha. Era la punt pendenta e l'ulteriura infrastruttura carmala adina puspei nova glieud en il vitg da Mustér. Denter auter era igl emprem campinadi Svizzer da schah nua che 285 atletas ed atlets han priu part. Visavi in Center Fontauna frunta il project da prestige sin sfidas. Il grond mantun da material reciclau decoretsch aunc adina la cuntrada denton il mantun dalla finanziaziun ei para buc aschi gronds. Las medias han rapportau da quens aviarts da pli u meins frs 400'000.- tier la fatschenta d'investurs. Tgei munta quei per il project a Mustér? Tier mei caschuna quella perscrutaziun in curios sentiment.

Ils eveniments, seigi ei sfidas ni success, pretenda da nus tuts bein ponderadas, persistentas ed curaschusas decisiuns. En quei senn, giavischel a nus tuts bunas sedutas.

Mortoris:

Dapi la davos seduta dil cussegl da vischnaunca ha ei dau suandonts mortoris:

- Schnoz-Schuoler Laurenzia, naschida ils 10.08.1944 e morta ils 10.06.2025
- Mathiuet-Giger Alexi, naschius ils 02.07.1936 e morts ils 17.07.2025
- Imelda Bigliel-Flepp, naschida ils 8 da matg 1932 e morta ils 12 d'uost 2025

Naschientschas:

Dapi la davos seduta dil cussegl da vischnaunca ha ei dau suandonts naschientschas :

- Albin Elia, naschius ils 26.06.2025, fegl dad Aurelia e Claudio Albin
- Albin Matia, naschius ils 26.06.2025, fegl dad Aurelia e Claudio Albin
- Mangiarano Gino, naschius ils 26.06.2025, fegl da Melanie e Francesco Mangiarano

Tractandas:

1. Protocol 4-2025/2028
2. Manteniment senda Gassa s. Gada e restauraziun mirs schetgs – Damonda da credit (messadi 08-2025/2028)
3. Revisiun parziala dalla planisaziun locala - Plan general d'avertura Recal (messadi 09-2025/2028)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér

Adrian Flepp
president

Roland Cajacob
actuar

1. Protocol

Protocol 4-2025/2028 dil cussegl da vischnaunca dils 27 da matg 2025.

Decisiun:

Il protocol 4-2025/2028 dalla seduta dil cussegl da vischnaunca dils 27 da matg 2025 vegn approbaus unanimamein.

Cussegl da vischnaunca Disentis/Mustér

Adrian Flepp
president

Roland Cajacob
actuar

2. Manteniment senda Gassa s. Gada e restauraziun mirs schetgs – Damonda da credit (messadi 08-2025/2028)

Presentaziun

Suprastonza, gerau Wendelin Jacomet:

Il gerau Wendelin Jacomet presenta cuort il messadi 08-2025/2028 e las ponderaziuns dalla suprastonza communal leutier e surdat silsuenter il plaid a cusseglier e planisader Christian Loretz dalla ipz ingenieure + planer ag per la presentaziun dil project.

Christian Loretz presenta ils projects ord vesta dil planisader ed Ingenieur. Igl entir perimeter dils mirs schetgs naven dad Acla da Fontauna sur S. Gada a Cuflons, si Mumpé Medel ed encunter Vergera ha ina fetg liunga historia.

Era persunas privatas han la pusseivladad da retrer contribuziuns dil cantun entochen 80% dils cuosts per la restauraziun da mirs schetgs sin lur terren.

Cun la restauraziun dils mirs schetgs duessen las interpresas che realiseschan quels il medem mument vegnir scolai per quella lavur speciala.

Debatta d'entrada

Cussegl da vischnaunca:

Tgei ei il motiv che quels credits vegnan parti si? Udessen quels buca ensemen? Lu resultass ina summa da frs. 485'000.-, pia cuort avon la responsabladad dalla populaziun.

Suprastonza communal:

Per ils mirs schetgs savein nus quintar cun contribuziuns dil cantun e dad organisaziuns interessadas vid objects historics e biodiversitad. Per la sanaziun dalla senda savein nus quintar cun contribuziun dall'ASTRA, denton buca dil cantun eav. Ord quels motivs havein nus spartiu si ils credits. Quei dat a nus la pusseivladad da prender ora il maximum da contribuziuns.

Igl ei era stau en discussiun da far dus messadis. Damai che quels projects han dil cuntegn anora in stretg connex ei la suprastonza denton sedecidida per in singul messadi.

En cass ch'il cussegl da vischnaunca giavischa da schar decider la populaziun sur dad ina fatschenta sa el pretender quei, independent dalla summa da credit. L'altezia dallas contribuziuns ein aunc buca enconuschentas. Cun risguardar quellas, vegnan ils cuosts totals ad esser marcant sut ils 500'000.- che stattan en cumpetenzza dil cussegl da vischnaunca. Plinavon vegn il credit suttamess al referendum facultativ, aschia ch'il pievel havess la pusseivladad da pretender ina votaziun

Cussegl da vischnaunca:

Eis ei necessari da realisar ussa quella sanaziun e restauraziun? Savess quei buca vegnir realisau pli tard?

Suprastonza communal:

Damai che la senda ei en in fetg schliet stan, eis ei fetg prudent da sanar quella avon il proxim unviern. Cun la senda vegnan sulettamein ils mirs directamein pertuccai restaurau. Far la senda senza ils mirs ni ils mirs senza la senda ei buca prudent. Denton vegn decidiu da ferton tier tgei lavurs che vegnan fatgas vid il mirs. Per l'entira restauraziun vegn quintau cun ina temps da realisaziun dad otg onns.

Cussegl da vischnaunca:

Nus stuein reservar la summa da frs 320'000.- per la restauraziun da mirs schetgs. Co reageschan ils convischins sche nus havein reservau daners per quei project e silsunter vegnin nus cun damondas dad alzar taxas eav.?

Suprastonza communal:

Quei credit vala sur otg onns ora. Per onn munta quei ina summa da frs. 40'000.-. Quella summa havess era saviu ir sur il quen da gudogn e sperdita per manteniment. Ord motivs da trasparenza leva la suprastonza denton far in project cun in agen credit ordlunder. Quella summa ha negina influenza sin autras fatschentas. Cu la summa totala da frs. 320'000.- ei duvrada si ei il project finius per nus. Ei dat negin credit supplementar per quei project. En cass che la finanziaziun ord organisaziuns da frs. 290'000 sa buca vegnir garantida, vegn il project scursanius per la summa munconta. Ord il credit da frs. 320'000.- fagein nus lavurs en ina valetta da totalmein frs. 930'000.-.

Cussegl da vischnaunca:

El perimeter dalla gassa traversa in dutg quella, resp. vegn in dutg menaus sut la gassa ora. Savess ei esser che quel ei la cuolpa che la gassa ei humida?

Suprastonza communal:

La senda ei vegnida survigilada da schetg e suenter ina plievgia. Ton il responsabel infrastruttura sco era igl inschignier manegian buca che quei dutg savess haver in'influenza sill'aua ella gassa. Quella pusseivladad vegn denton a persequitada.

Cussegl da vischnaunca:

Igl ei da beneventar ch'ei vegn era fatg lavurs dalla vart dil sid dalla vischnaunca e buca mo en connex cun las pendicularas. En tgei stan ei il trutg denter Vargera e Curaglia sin il territori dalla vischnaunca da Medel/Lucmagn?

Suprastonza communal:

La senda naven dils cunfins da Medel ei en in marcant meglier stan che quellas dalla vart da Mustér. Cun la vischnaunca da Medel/Lucmagn essan nus aunc buca stai en contact en caussa, quei vegn denton aunc fatg il proxim temps.

Deliberaziun en detagl

Cussegl da vischnaunca:

Supplementar tier la sanaziun dalla senda a s. Gada fuss ei aunc da prender en egl la senda a Turtengia encunter Via Run.

Sche nus fagein ussa quell'investiziun savein nus quintar cun aultas contribuziuns. Co quei vesess ora l'auter onn ei buca clar. Quels projects ein da sustener.

Suprastonza communal:

Tier la votaziun vegn ei a dar ina votaziun singula per mintga credit.

Decisiuns:

Sin fundament dallas ponderaziuns suranumnadas decida il cussegl da vischnaunca:

1. cun 12 encunter 1 vusch da conceder in credit da frs. 165'000.- per la sanaziun dalla senda s. Gada.
2. Cun 8 encunter 5 vuschs da conceder in credit da frs. 320'000.- per la restauraziun dils mirs schetgs senda s. Gada entochen Vergera cun suttametter quei conclus tenor art. 21 litr. c dalla constituziun communalal al referendum facultativ.

Cussegl da vischnaunca Disentis/Mustér

Adrian Flepp
president

Roland Cajacob
actuar

3. Revisiun parziala dalla planisaziun locala - Plan general d'avertura Recal

(messadi 09-2025/2028)

Presentaziun

Il president communal René Epp presenta cuort il messadi 09-2025/2028 e las ponderaziuns dalla suprastanza communal leutier cun presentar nua che las novas lingias vegnan ad ir atras.

Sut debatta d'entrada giavischa negin il plaid, aschia ch'ei suonda la deliberaziun en detagl

Cussegl da vischnaunca:

Quellas lingias novas vegnan denter auter a traversar terren communal. Contas parcellas pertucca quei e dat ei ina pusseivladad da pretender ina contribuziun per quellas traversada?

Tgei schabegia sch'in proprietari dat buca siu consentiment da traversar siu terren cun las lingias?

San ins pretender che novs implonts solars ha da vegnir construi aschia, ch'els tschorven buca cu il sulegl dat sisu?

In semegliont project vegn tractaus da numerusas instanzas, aschia ch'il cussegl da vischnaunca duess sustener quella fatschenta.

Suprastanza communal:

La lingia nova vegn a traversar totalmein 5 parcellas dalla vischnaunca. Quei che pertucca contribuziuns per la traversada: Certas interpresas sco la Repower pagan ina contribuziun annuala per il diever da terren public. Plinavon vegnan las lingias purtadas en el cudisch funsil ed era en gliez connex dat ei indemniziuns. L'altezia dalla contribuziun dependa dalla grondezia dil foss.

Per la traversada sto vegnir tratg en il consentiment da tut ils proprietaris da terren. En cass ch'in proprietari less buca dar quei consentiment sa quel el mender cass vegnir sfurzau sin via giuridica.

La damonda concernent la construcziun dad implonts solars savess esser in tema per la tractaziun dalla lescha da baghegiar en connex cun la revisiun totala dalla planisaziun locala.

Decisiun:

Sin fundament dallas ponderaziuns suranumnadas decida il cussegl da vischnaunca unanimamein:

1. *d'approbar la revisiun parziala dalla planisaziun locala concernent il plan general d'avertura 1:2'000 Recal.*

Cussegl da vischnaunca Disentis/Mustér

Adrian Flepp
president

Roland Cajacob
actuar

4. Ura da damondas

Alla suprastanza communal ei vegniu inoltrau treis damondas a scret. La suprastanza communal pren posiziun sin suandontas damondas ord il miez dil cussegl da vischnaunca.

Theres Burri-Gadola

Damonda:

La sesiun aulta dalla stad va encunter la fin. Biars hosps han visitau nossa regiun e priu la caschun da visitar la pendenza. Quei ei fetg legreivel.

Buca legrevla ei la situaziun da traffic el quartier Gonda. L'entira stad ein ils turists setschentai culs autos e cullas rulottas en Gonda. El meglier cass han els parcau sil parcadì Gonda. Biars denton ein i vinavon, han parcau sil parcadì dalla fatschenta Flurs Sampaguita ni sin parcadis privats ni sils praus. Quella situaziun ei buca mo malemperneivla pils vischins da Gonda ed ils hosps. La situaziun ei era prigulusa per ils pedunz. La via ei stretga e nunsurveseivla, autos san buca cruchar.

El protocol da nossa seduta dils 30 d'avrel ei nudau, che la signalisaziun per il traffic sco era tablas cun avis per privats seigien planisai. La finamira seigi, che la signalisaziun vegni realisada avon l'entschatta dalla sesiun aulta da stad. Jeu hai entochen ussa viu negina tala signalisaziun. Co ei il stan actual dallas lavurs?

Risposta (gerau Wendelin Jacomet):

Nus essan pertscharts dalla situaziun fetg malemperneivla a Gonda e havein gia avon in pli lung temps instradau la signalisaziun nova dil parcadì per la pendenza. Cun quella signalisaziun duess il traffic vegnir menaus naven dalla sbuccada dalla Via Gonda ella Via Cons ensivars e sil parcadì Grava. Nus seperstgisein che quei drova ton temps. Las tablas ufficalas ston vegnir empustadas tier in furnitur specialisau e quel ha giu in pli lung temps da furniziun. Avon entgins dis havein nus retschiert las tablas e pil mument sesanflan quellas sil magasin dil menaschi tecnic, pinai per la montascha. Per lezza drova ei denton puspei ina maschina («Hebebühne») e lezza stat a disposiziun per il davos da l'autra jamna. Magari drova tut semplamein dapli temps che quei che nus tuts gjavischassen. Nus engraziein per la capientscha.

Adrian Flepp

Damonda:

Alla seduta da cussegl dils 13.09.2024 havein tractau la risposta dalla suprastanza sin la moziun "Rinforzar la posiziun dalla cumissiun da gestiun". En quella scriva la suprastanza ch'igl ei previu d'instradar ina cumissiun speciala egl emprem quartal 2025. Nus essan gia el tierz quartal e sin damonda tier il menziunari, ei aunc buc vegniu instradau la cumissiun. Tenor regulativ da fatschentas ha la suprastanza peda in onn da corrispunder alla moziun suenter lur risposta al cussegl dils 13.09.2025.

Damonda 1: Daco ei la cumissiun aunc buc vegnida instradada e tgei ei il motivs?

Damonda 2: Cu ei eis quintau d'instradar la revisiun dalla costituziun communal?

Risposta (president communal René Epp):

Bugen informein nus che la revisiun parziala dalla constituziun sa per vegnir instradada egl'emprim quartal 2026. Nossas prioritads uonn ein cunzun stadas il siaraquen 2024 en vesta dil niev persunal e la revisiun totala dalla planisaziun locala, tier la quala nus havein gest saviu tarmetter oz il messadi el process politic. Omisduas fatschentas han occupau fermamein il president communal ed il meinafatschenta. Il siaraquen ha saviu vegnir serraus giu cun success e la revisiun totala ei en stretga e gronda collaboraziun cun il genau cumpetent ussa ella fasa finala. Plinavon havein nus instradau uonn in niev e simplifichau process dall'elaboraziun dil preventiv ed essan els studis da simplificar ed integrar el process dil preventiv era il plan da finanzas. Sper quellas grondas ed impurtontas fatschentas eisi buca stau pusseivel da parallel aunc instradar il procedere dalla revisiun parziala dalla constituziun communal. Il process politic dalla revisiun totala dalla planisaziun locala e dil preventiv cuozan segir aunc entochen alla fin digl onn. Plinavon drovan auters impurtonts ed urgents projects actualmeins noss'attenziun. Aschia engraziein nus per la capientscha che la suprastanza vegn a saver sefatschentar per el decuors da l'auter onn cun igl impurtont project dalla revisiun parziala dalla constituziun communal.

Silvia Bucheli, Christian Loretz

Damonda:

Cun questa damonda supplichein nus da dar informaziuns davart il stadi actual dalla planisaziun d'in binari da parcar da vart dalla MGB en la zona da mistregn Segnas/Pignola.

1. Cu ed en tgei fuorma ei la resoluziun, ch'ei vegnida suttascretta comunablamein dil parlament communal ed dalla suprastanza communal, vegnida tarmessa als organs responsabels?
2. Tgei rispostas ni reacziuns ein entochen oz vegnidas anavos dallas instanzas contactadas (en special digl Uffeci federal da traffic per viafier e dalla regenza Grischuna)?
3. Co giudichescha la suprastanza communal il stadi actual dallas planisaziuns da vart dalla MGB sigl intschess dalla vischnaunca da Mustér? Dat ei novas informaziuns, tractativas ni projects concrets che vegnan actualmeins discussai?

Risposta (president communal René Epp):

Suenter numerusas discussiuns e contractivas concernent pliras variantas per in binari d'untgida sil territori sut Segnas ei vegniu inoltrau il davos November 2024 ina resoluziun ord il ravugl dil cussegl da vischnaunca cun la supplica, da tarmetter vinavon quella als responsabels dalla MGB. Quella ei vegnida tarmessa vinavon alla MGB ils 10 da december 2024 cun la supplica da risguardar la veglia politica dalla vischnaunca da Mustér per las planisaziuns futuras.

Sinaquei ha giu liug ils 14 da fevrer 2025 ina seduta virtuala cun ils representants dalla vischnaunca, ils responsabels dalla MGB ed exponents dalla fatschenta da planisaziun Bänziger Partner AG, nua ch'igl ei aunc inagada vegniu discussiunau las treis variantas sut Segnas ed in'ulteriura varianta a Garmischeras. Il facit ord quella seduta ei stau da far sclariments technics per las variantas «Segnas Ost» e «Garmischeras» e la vischnaunca duess inoltrar ina posiziun per la varianta «Segnas Mitte».

Quella posiziun davart la vischnaunca ei vegnida inoltrada il mars 2025 cun menziunar che la vischnaunca preferescha clar ina varianta «Garmischeras» e cun aunc inagada far attents sin ils disadvantages dalla varianta sut Segnas. Dapi quei scriber havein nus buca intervegniu enzatgei dalla MGB e dumandau suenter en con connex cun la damonda ord il cussegl.

Sinaquei havein retschert suandonta risposta dalla MGB (mail dils 13-08-2025):

Gerne nehme ich Stellung auf ihre Anfrage:

- *In den vergangenen Monaten seit unserer letzten Besprechung haben wir intern nochmals die verschiedenen möglichen Standorte entlang der Bahnstrecke von Dieni bis Disentis angeschaut und beurteilt. Das Ergebnis deckt sich mit der bisherigen Beurteilung. Segnas bleibt nach wie vor der für die Matterhorn Gotthard Bahn idealste Standort. Ein Abstellgleis am von der Gemeinde vorgeschlagenen Standort Garmischeras ist aus topographischen Gründen nicht realisierbar.*
- *Eine Besprechung bezüglich der Variante 1 in der Gewerbezone in Segnas (Abstellgleis unterhalb des Streckengleis, mit der sich die Gemeinde gemäss Schreiben vom 28.03.25 einverstanden erklären könnte) hat stattgefunden. Hier sind wir auf die Landabtretung des Ofenbauers Giger und der Firma Berther angewiesen. Firma Giger Specksteinöfen hat uns informiert, dass Sie eine Erweiterungsbaute planen und auf das Grundstück nicht verzichten können. Somit sind die Varianten in der Gewerbezone Segnas nicht realisierbar.*
- *Somit verbleibt lediglich die Variante Segnas Ost, welche weiterzuverfolgen ist. Wir sind jedoch bestrebt, das Projekt im Interesse der Gemeinde zu optimieren (Flächenbedarf, Lärmschutz etc.). Wir werden gerne einen Termin Ende September mit der Gemeinde vereinbaren, an dem wir das aktualisierte Projekt vorstellen werden. Anschliessend werden wir das Projekt weiter vorantreiben, damit dieses dem BAV zur Bewilligung unterbreitet werden kann.*

La vischnaunca vegn ussa a spitgar giu il termin dil davos settember cun la presentaziun dalla versiun actualisada dalla variante «Segnas Ost».

Cussegl da vischnaunca, cuss. Christian Loretz:

Ei schai egl interess dalla populaziun – ed aschia era en nossa responsabladad sco cusseglier(a)s –, ch’il pli dallas cusseglieras e dils cussegliers stattan davos quella resoluziun da buca sustener quei project dalla MGB a Segnas/Pignola.

Ina nova discussiun sur da quei tema astga e sa buca haver liug. Enteifer ils vischins da Segnas ei quei binari gia vegnius tematisaus, ed en gliez ravugl dat ei negina capientscha persuerter dad unfrir terren agricol custeivel – surtut buca sch’ei setracta da terren dad aulta qualidad ch’ei buca enzonaus ed ei era buca previus dad enzonar.

Jeu appelleschel instantamein da buca tucrar en quei spazi sensibel e da buca promover mesiras da baghegiar en quei liug. Ei setracta dad ina zona dad aulta qualidad da viver e culturala – buca sco davos ord il motiv che Segnas fa part dad in spazi dad in maletg dil vitg protegiu che dat tempra all’entrada dil vitg. Mintga intervenziun vegness a periclitare considerablamein quella structura carschida.

Ina planisaziun sin quei terren intact, e lu aunc sin quei spazi protegiu specialmein, fuss ina cesura gravionta e durabla. Cheu sto la veglia e l’acceptanza dalla populaziun haver la pli aulta prioritad. En vesta dad ina pusseivla expropriaziun ei aschia in ‘intenziun da refusar claramain.

Jeu appelleschel da buca entrar e sustener ina da quella variantas a pignola e anflar ina autra soluziun.

Damondas a bucca

Cussegl da vischnaunca:

Sut il vitg da Segnas vesa ei ora sco sin in implont da glera. Co ei il stan dil plazzal dalla firma Berther?

Suprastonza communal:

La vischnaunca ha dau la lubientscha da drizzar en il plaz d'installaziun ed era da rumper la crappa el liug. Nus havein lu intervegnu ch'ei vegni menau neutier material. Els ein vegni visai vi sin quei a scret ed ei ha era giu liug discussiuns cun ils proprietaris e nus mein da quei anora, che la situaziun a Pignola semigliuri. Il tact da mes'ura el traffic public denter Mustér e Cuera vegn menaus en aunc uonn. Ils bus che vegnan duvrai persuerter basegnan in suttetg. La Posta ha anflau ina sligaziun persuerter sigl areal dalla firma Berther a Pignola naven da miez digl onn 2026. Aschia sto quei object esser finius entochen lu.

Cussegl da vischnaunca:

Igl ei vegniu fatg menziun ch'ei duessi dar in zona 30 per il traffic entras igl entir vitg. Co ei il stan da quei project?

Suprastonza communal:

Ils responsabels ein sesi ensemen cun il cantun per discutir quei tema. Ina zona 30 sur igl entir vitg vegn plitost buca en damonda, denton vegn persequitau ina prolungaziun dalla zona actuala. Actualmein cuora in'expertisa davart dil cantun e sin basa dils resultats da quella savein nus persequitar vinavon quei project. Tenor cefras dil cantun ha il traffic entras il vitg priu giu dapi ils onns 90.

Cussegl da vischnaunca:

Binari Segnas: Igl ei buca dad entrar sin in project dad in binari Segnas Ost. Quei ei exact quei che nus lessan buca. Ei dess puspei canera e glera. La vischnaunca sto tener encunter cheu politicamein e mirar ch'ei detti buca il binari sut Segnas.

Cussegl da vischnaunca:

Acla da Fontauna: RTR ha publicau in artechel critic en connex cun ils investurs. Tgei ei il stan actual dil hotel.

Suprastonza communal:

Radiotelevision Svizra Rumantscha (RTR) ei en sia contribuziun buca diltut stada correcta cun las informaziuns. Tier igl object numnau a Spreitenbach ein varga 99% dils cuosts vegni pagai. Da gliez resda negin. Las lavurs ch'ei vegni exequidas entochen oz ad Acla da Fontauna han ina valetta da ca.15 milliuns. Quei ei vegniu pagau. Ei sa esser ch'ils investurs spetgan sin che la fieria vegn megliera. La lubientscha definitiva han els retschert per avon entgins meins, igl avrel 2025. La via da quartier duess vegnir realisada igl atun e la fundaziun la primavera.

Communicaziuns

President communal:

Nus havein scret ora ina piazza per completar il team digl uffeci infrastruttura e baghegiar. Ei dat adina dapli damondas da baghegiar e tut vegn pli complex. Il diember da recuors pren tier e tut quels recuors ston vegnir tractai. Plinavon vegn pretendiu da far dapli controllas. Quei ei grev da metter entuorn. Era remplazzar igl anteriur responsabel digl uffeci, che ha adina luvrau bia dapli che la norma ei buca sempel

Ils 22 d'uost ha liug ina sera d'informaziun per la populaziun. Nus supplichein da prender part quella sera sch'igl ei pusseivel.

President dil cussegl da vischnaunca:

L'invitaziun ufficiala per la sera d'informaziun extramuros dils 25 d'uost 2025 ha il cussegl da vischnaunca retschert oz.

La proxima seduta dil cussegl da vischnaunca ordinaria ha liug mesjamna, ils 10 da settember 2025.

Cussegl da vischnaunca Disentis/Mustér

Il president:



Adrian Flepp

Igl actuar:



Roland Cajacob

Disentis/Mustér, ils 27 d'uost 2025